



TAPAK 7

Tarutsü tajungba ka asoshi timtem karbo aremtsüla: Venkaiah Naidu



TAPAK 3

PM Modi-i Lengyan enokba atema Manipuri nungeri pelar

VOL. XVII NO. 167 (ADOK 167) DIMAPUR

RASEMNÜ (WEDNESDAY) RONGCHII (APRIL) 15, 2020

5.00

May 3 tashi linük shibangtsü: PM Modi

New Delhi, April 14 (Agencies): Mongulbarnü Prime Minister Narendra Modi-i May 3 tashi linük ajunga shibangtsü mapang atsülang aser April 20 nü tenokdangba agüja alibatem meyipa reprangshimtsü telemtetba agiogo.

"Tebilemba ajak angadanga sülen, onoki May 3, 2020 tashi linük ajunga shibangba atsülangtsü lemtetogo" ta tanü Modi-i minute 25 o jembidang ashi.

"April 20 tashi district aser state shia nung mapa inyakba jungunga repranga atatsü. Iba sülen jiang tenokdangbatem salatsü atema meyipa reprangshimtsü" ta paisa ashi.

Tanü tashi nung India nung

COVID-19 aketer ajak agi nisung 10,363 aser tasür 339 liasü, ta Health Ministry-i metetdaksü.

Nagaland shibangba atsülanger Dimapur, April 14 (TYO): National Disaster Management Authority (NDMA) aser Ministry of Home Affairs (MHA) ajanga tetuyuba agütsüba nung ajemdaker May 3 tashi Nagaland state ajunga shibangtsü, ta Nagaland Chief Secretary-i taonung sangdong ka nung metetdaksü.

Iba ya COVID-19 azüoktsü atema lir aser Nagaland sorkar kübok Department ajaki tenokdangba agüja aliba ama mapa inyaka aotsü tuyur, ta Chief Secretary-isa ashi.



April 14, 2020 nü Dimapur Ao Lanur Telongjem (DALT)-i Special Committee, Covid-19 Dimapur den senden ka amendang agiba noksa angur. Iba senden ya Commissioner of Police, Dimapur indang office nung amen aser DALT ketdangpurtemi Y. Kikheto Sema IAS, Liremo Lotha IPS, Rothihu Tetseo IPS aser Bendangwati Ao OC, Chumukedima nunger den senden amendang iba tensa nung teinyaktsü mapa balala indang tebilembatem benoka olemtep. (Dimapur, April 14)

Nagaland Governor-i COVID-19 osang metetpela

Dimapur, April 14 (TYO): Nagaland Governor R N Ravi-i tanü state nung COVID-19 dak sendakba osang metetpelaogo.

Raj Bhavan Kohima nung senden amendang Nagaland Chief Secretary Temjen Toy, Commissioner & Secretary Home, Commissioner & Secretary Health & Family

Welfare aser Director General of Police nungertem aden.

Dimapur nung alir ka dak COVID-19 putetba sülen tanü senden nung coronavirus anema inyakba mapa nung metokmeperi aser tashimaitbatem ajiteta, tajungba nung inyaktsü atema tebilembatem lemsatp.

(Maneni tapak 9 nung...)

Mkg nung nisung ka quarantine süa lir

Dimapur, April 14 (TYO): April 13, 2020 nü Mokokchung nung Jorhat nung alir tsümar ka Quarantine facility centre nung yua lir.

Iba nisung ya ambulance ka nung anir aru aser Tsutapela Check Point nung jungjunga tendangba sülen Mokokchung-i anir aru, ta Superintendent of Police, Mokokchung-i tanü sangdong ka nung metetdaksü.

Pa ya Lemjem Hospital Mokokchung nungi Jorhat mesüra Guwahati nung anepalutsü atema yok aser pa

Sanjivani Hospital, Jorhat nung amungba sülen Mokokchung-i meyipa aru.

COVID-19 inyakyim lateta aliba ama iba nisung Quarantine facility centre (Multipurpose sports Complex) Mokokchung nung yua lir, ta SP, Mokokchung-isa ashi.

Külen, Dimapur nung alir ka dak COVID-19 aketba putetba sülen, Mokokchung District Task Force-i tuyuba ama Mokokchung-Wokha-Kohima nung inter district check point lapokogo aser iba nung gari ajak mita reprangtsü, ta SP-isa shisem.

'Community Kitchen' khen anena atar saka koda masürtembo yaritsü

Mokokchung, April 14 (TYO): Mokokchung District administration den külem sür Mokokchung Town Baptist Arogo (MTBA)-i mezüng lockdown tenzüka anogo April 2 nungi April 14, 2020 tashi MTBA tenla kima "Community Kitchen" lapoka koda masür timtemertem nem angati sorochioka chiyungdakja aruogo.

April 14 nü tatemsa chiyungdaksüba anogo item timtemer nem MTBA-isa nungdakba chiyungtsü kar seper

angati lema agütsüogo.

April 2-14 tashi community kitchen lapokba mapang anogoshi koda masür nisung 80-90 tashi angati chiyungdakja liasü, ta osang ajanga angazüker.

Community Kitchen ya mezüngren lockdown atema dang liasü aser ibaji tanü April 14 nü tembanger, anungji, iba mapa khen anena atar, aji saka, koda masürbo ano arogoi maneni yaritsü", ta MTBA tenzükertemi iba osangbener den jembidang lemsatp.

COVID-19 anema longjemer raratsüla: Temjen Toy

Dimapur, April 14 (TYO): Nagaland dena alima ajunga ayimsünga prokshiba wara COVID-19 anema inyakba mapa nung nisung ajaki tangatetba tajung nung yariteptsü mepishir, ta Mongulbarnü Nagaland Chief Secretary, Temjen Toy-i metetdaksüogo.

"Nagaland sorkari iba wara azüoktsü atema akokba tashi mapa inyaker, saka tashidak tasen ka asünung, asenokia tangar ama iba tashidak azüoktsü aser noktangtsü atema koma raratsü aser kechi inyaktsü ta asüba lenmangtem bushia inyaka arur" ta Chief Secretary-isa ashi.

"Sorkar aser iba rara nung

sendaktepa alirtemi inyakba nung metokmeperi mesüra aibelena inyakbatem lir, saka onoki anogoshia angazüka tajungba inyaktsü meranger. Tanü iba tensa ajuruba ajanga asen health delivery system jenjang majungba tali angatetdaksüogo aser iba jagi sorkari tekaratiba nung jenjang tajungba kümdaksütsü atema meranger" ta Temjen Toy-isa shisem.

Mongulbarnü Chief Secretary indang War Room on Covid-19 tentetogo aser iba nung information system kanga junga sendakteptsü aser state ajunga nung Covid-19 maparen atema telemtetbatem agitsü. Anungji

nübertemi tebilemba tajungtem temjentoy.gov.in nung yoktsü ayongzüker, ta paisa metetdaksü.

Tanü Chief Minister, Neiphiu Rio menden ser minister aser advisor tem senden ka menogo aser idangji district balala nung nungdakbatem aser teinyaktsü onüktem benoka lemsatpogo, ta Chief Secretary-isa metetdaksü.

COVID-19 anema rara ya nübertem rara ka lir aser iba nung civil society tem dena lir. Iba jagi Deputy Commissioner tem dang District Task Force tentetba nung tribal hoho züngsem anana dendaksütsü atema tetuyuba agütsüogo, ta Temjen Toy-isa ashi.

Mozü kidang inyaker tem nungi sen katizüker Covid 19 putetsang medical report mangu

Dimapur, April 14 (TYO) : Atangji, tang ya alima ajak nung Covid 19 tashidak wara mekokteti raraba mapang lir, ajisüaka Nagaland nungbo wara tonga marudangyongi, terenemtsü junga merenemtetba agi, teka metongtsüsaba tensa tia ka nung ketdangsertem aser nübertem ajak shisaboluptepa angur.

Ano, iba ama mapang ka nung Dimapur nungbo mozü kidang inyaker tem nem ita sen talila temloker agütsütsü melen, parnok ita sen nungiang katizüka agi, talisa, ita sen tila achir tilartembo kanga mepelai lir.

CMO Dimapur nungi sangdongba osang ka nung, parnok inyaker tem ajak March ita sen nungi Gazetted purtem senpak 1000, Grade III purtem nungi senpak 700, Grade IV purtem nungi senpak 500, Adhoc Grade -III purtem nungi senpak 200 aser Adhoc Grade IV purtem nungi dena senpak 100 katizüksü asoshi metetdakja lir.

Iba senji "Office Welfare fund aser maintenance" atema ta shia lir.

Anosa osang ka ajanga angazüka agi, Dimapur nungi yokba nisung ka dak Covid19 tashidak puteta lir ta Social Media nung Assam Medical Minister-bai metetdaksüba dak alema, ano pa indang medical report tejangja Nagaland government ket tonga ali asü maliar mejangjateter.

Osang kar ajanga, Nagaland nung Covid 19 tashidak agi shiranger kar danga Covid mozü ki asütsü shimeta aliba mozü kitem nung yaritsüsa atalok nungbo, shirangertemjibo yutsür doctor-tem asoshi tashidak memenatsüsa teni tebang nembangba mask dena junga renema mali ta angazüka agi, Mokokchung nung IMDH mozü kidang ketdangser ka den asüngdangtep dang, "Covid 19 agi shiranger anepaludang teni tebang nembangtsü mask karbo yoka lir saka mopung tamajung nokdangtettsüsa respirator maket, anungji temaba menden

nung alirtem dang shiogo," ta metetdaksü.

Iba ama tashidak den aleptepa raraba mapang, item osangtemji angazüka tanü Dimapur District Hospital nung inyaker tongti ketdangsertemi sangdong ka nung ashiba agi, tang tashi nung Covid 19 agi shirangertem yaritsü asoshi ICU nung yipten 6 lir aser tanga takdangtem nung yipten 63 lir.

Iba denji doctortem atema sübotsü aser mask shitak peria lir ta metetdaksüogo.

Iba denji Dimapur District Hospital nung 500 kv transformer ka amenlokdagi aser PHED purtemi tzüa tutsüdagi aser ano mozü ki meketa lenmang black topping yokdagi ta Dimapur mozü kidang ketdangsertemisa metetdaksü.

Shingaia osang mejangja ser kecha memetetdaksüner aser tajungba küma renemtsü atema tai tuteta ashibatambo ajak pelashishia agizüktsü ta parnokisa metetdaksü.

CORONAVIRUS WARAS ENOK LONGJEMER AKOKTSÜ ASOSHI -
Kechalania Moi Kidang Mongang; Tangar Anasai Tou;
Teni Tebang Sü agi Nembangang; Temang Tashi Itita Yuang;
Kidang Asentzü Sendoka Exercise Agiang aser Sarasademang.

Mangkolemba Sub-division kübok makamaiter nem teyari agütsü



Dimapur, Rongchii/April 14 (TYO): Alima ajunga sünga prokshia aliba novel coronavirus tashidak nungi jenbua alitsü mechi linük aser state tesem ajungalen shibanger aliba mapang Minister, Higher & Technical Education, Tribal Affairs, Nagaland aser State BJP tir, Temjen Imna Along aser Advisor, Treasuries & Accounts, National Highways, Dr Longriniken nati achayanga April 08 nungi 11, 2020 anogotem nung Mokokchung district kübok Mangkolemba

sub-division nung aliba yimtsüngtem nungi makamaiter aser talisa matamabensar aser teintet rongtem nem jang-o-tzü angadi lema agüja liasü. Mangkolemba sub-division kübok ADC Mangkolemba-i anir Headquarters pezü lir (Border Magistrate kübok Merangmen Hq, EAC Longchem Hq, EAC Alongkima Hq, ADC Mangkolemba) aser yangji yimtsüng 40 dak tema lir. ADC Mangkolemba tawabangba kübok item yimtsüngtem nung coronavirus

mechi tesem ajanga nokdanga aliba mechi timtema aliba nüburtem, talisa teintet rogo aser matamabensarterem nem jang, dal, alo aser totzü angadi lema agütsüba den külemi sub-division kübok CHC 1, PHC 4 aser sub-centre 20 nem surgical mask, gloves aser phenyls amala osettem agüja liasü, ta menur aruba osang ka ajanga ashi. Sub-division kübok yimtsüngtem nungi putu menden den angatettepa item teyari oset ya lemdanger agütsü, ta osang ajangasa ashi.

COVID-19 den raratsü sorkar renema mali: AKTD

Dimapur, Rongchii/April 14 (TYO): Tang tashidak wara agi alima sünga aliba den raratsü asoshi state sorkar renemshia aliba ngua, Ao Kaketshir Telungjem Dimapur (AKTD) ajanga mepelaba lemsatsep. Nagaland nungi COVID-19 tashidak mezüngbuba putetba ajanga mawajemba mesüra memetetba tapok aika temai adoktsüogo. Medical Department aser Healthcare unite tem tsüngda osang timi magitepba ajitetogo, koba novel coronaviru alitsü südi ta temulung melema alir COVID hospital nung mezüng anepalutsü melena nija mozükidang anepaluba ajanga sayur, ta AKTD tir, Moayanger Jamir aser tongti zülur, Neken Walling ajanga sangdong ka nung ashi. Iba tatalokba ajanga state tesem ajunganung nüburtem tsübuteper, rata-matar aser tezü adanger. Iba wara den raratsü asoshi ajak renema lir ta asüküm keter jembia aruba state ka Nagaland asoshi mezüngbuba COVID-19 agi shiranger indang tejangja Assam indang Health Minister-i ang tweet asüba ya maksü ka lir. Asen sorkari iba tatalokba indang khenyongi memeteti

aliba ya kanga tia maka lir, ta AKTD ajanga ashi. Dimapur nung iba tashidak wara nungi nokdangtsü asoshi inyakertem (frontline workers) nem tim osettsüet agütsütsüla, shishilempaba tesemtem jungjunga shibangtsüla aser nüburtem nem nüngdakba osettsüet kishizüng tonga bener arutsütsüla, ta Dimapur nung aliba Aor kaketshir lokti tentet ajanga ashi. District nung lokti nungi pila aliba (social distancing) inyakyim nung kanga mejungi tamakok alua arur aser timi achayanger maliba ajanga nüburtem tetsübu agi shishilempaba tesemtem nung nungzütepa ljalilyongtsüsa aküm. Nisung aika taküm lendongbang nung yutsüogo aser anogo ishika tsüngda Dimapur nung iba tashidak bulua angutsü südi, ta parnoki shisabulua ashi. Iba virus prokshiba nokdangtsü tamakoktsü kümogo, aser tang anünga aliba lenmang ajak agi sorkari totuyubatem akhanga amshidaktsütsüba ya dang lir. Nagaland nung iba wara aliba sayuogo, anungji sorkari kanga sashia iba wara nokdangtsü

asoshi inyaktsü ajungshir, ta sangdong ajangasa ashi. AKTD ajangasa ashiba agi, iba virus yagi takar-sensaker shinga mebendanger, aser nisung ajak dak iba virus menatsü tensa ka nung aliba mapang sorkari taküm libaliru, wadang mesüra kaa ita aliba mereprangi ajak nem talenba kasa agütsütsüla. Sorkari amenoka aliba quarantine facility tema tia kanga mejungi aliba angazüker. Junga anepalu masüba den nisung meimchir ayutsüba takdang tem nung koya senzüba osangtema angazüker. Anungji iba atema ketdangsertemi telangzüba agütsütsüla aser item tesemtem mürekmejutsüba ya teinyaktsü tongtibangtiba asütsüla, kechiaser item tesemtem ya ozüng nung aibeleneritem anidena ayuba tesem ka masü, ta AKTD ajanga ashi. Item kulitem ajanga asen sorkar tamendak dak tia chichiba sayur. Mapang meindoki yimten yimsüsür aser sorkar lenirtemi tali teyakyakba nung mera agitsüla, aji mesüra COVID-19 anema raraba kodanga makoktsü, ta AKTD sangdong ajangasa ashi.



Mokokchung bazaar nung aonsotsü ayokertemi aonsotsü tapu balala ayokba yangi noksa nung angur. Lockdown mapang ka süaka nüburtem timtemba ngua tawa tanü district administration-i achayanga yimtsüng kar nungi aonsotsütem bener arua yokdaksüdar, ta osang angazüker. "Iba mapa ya yakta nungi tenzüksüba liasü, iba ajanga town nung alirtem dang masü saka aluyimertem lenmang aisü nung tajangzük angutsü, anungji, yimtsüng ajaki inyaktsüla", ta iba osangbener den senso kati jembidang lemsatsep. Mokokchung, April 14, 2020

MCCI-i nüburtem süngjemshitsü mepishir

Mokokchung, April 14 (TYO): India ajunga nung lockdown May 3, 2020 tashi atsülangba den ano Dimapur nung Covid 19 positive putetba osang jagi Mokokchung nüburtem maoksatsüla saka süngjemshia sorkar bangdaki kechi tetuyuba agütsür, iba nungji tashi angaa anitaktsü mepshir, ta Mokokchung Chamber of Commerce & Industries (MCCI)-i sangdong ka ajanga metetdaksüogo. Iba lockdown mapang timtem jenti liaka, nüburtemi sorkar bangdak den amalitepba asoshi MCCI-isa pelaba olen ka lemsatsep. Mokokchung market nung tongtibang nungdakba chiyungtsütem ajak peria lir ta tanaben nüburtem dang nenshia ashir aser yamaji lidaktsütsü asoshi akokba tashi inyakdar, anungji, nüburtem aoksar chiyungtsü talila alidena meyudaktsünür", ta

MCCI-isa mepishia ashi. Iba dak sentakba nung "Kodang alima tensa tia süngjema kümdir, chiyungtsü talila alidena ayur ket nungi onoki tanaben malizüiktsü, anungji, nüburtemi aji meteta shishidaktsünür", ta parnokisa shisem. "Iba lockdown ajanga Mokokchung nung business inyaker lenmang aisü nung takoksa ajurua arudaki, aji saka, nenok ajaki aremzüka bangdak den amalitepba asoshi talisa business inyaker ajak dang pelar", ta MCCI-isa ashi. Mokokchung Task Force-i anir Covid 19 tongpang nung yakbangsür (frontline workers), mezüng langzürtem (first responders), Core Committee on Essential Commodities COVID-19 Mokokchung aser lokti tentet shirnokisa iba alima wara anema raraba nung shilem agidar, parnok ajak dang MCCI-isa pelaba metetdaksü.



Covid hospital Mokokchung nung shirangertem asoshi yipten ana ya renema lir. (Mkg. April 14, 2020)

Chennai nung Naga nunger aika timtem nung lir

Dimapur, Rongchii/April 14 (TYO): COVID-19 prokshiba nungi nokdangtsü mechi linük ajungalen shibanger aliba mapang Nagaland sorkari Nagaland CM's relief fund for COVID-19 nungi sen lakh ka Chennai telungzük aser temeket nung aliba Naga nunger pei kidangi moteti timtema alir nem agütsü, ta Nagaland in-charge Covid-19, Chennai aser Pastor, Naga Christian Fellowship Chennai aser North East India Welfare Association Chennai aser Naga Students' Union Chennai tir, Chibenthung nati sangdong ka ajanga ashi. Iba sen nungi onoki Nagaland nungi pei kidangi moteti timtema yimti nung aliba nisung 205 nem teyari balala agütsü, kong nisung 126 nem jang-o-tzü aser nisung 79 nem sen 1,000 agütsü. Ano maneni Nagaland nungi nisung aika Chennai nung timtema lir,

kechiaser parnok mapa nungi anener assert kaket rejutem shibanga lir. Nagaland Chief Minister Neiphiu Rio, C Shanavas, Principal Director, School Education Department aser Asale Lese, Under Secretary, Government of Nagaland nungertem ajanga item teyari agütsüba asoshi parnok dang pelar, ta sangdong ajanga ashi. Parnoki ashiba agi, Nagaland CM Relief Fund nungi sen teyari agütsüba ajanga Chennai nung timtema aliba Naga nunger nem teyari agütsüba osang tejangja Nagaland sorkar nem April 14, 2020 nü agütsüogo. Chennai ya 'red zone' ka asünung Nagaland nungi kaketshirtem aser 'unskilled worker' tem anogoshi tali tali tim atemer, anungji ano maneni Nagaland state sorkar aser temulungertem nungi teyari agütsütsü imla atar, ta sangdong ajangasa ashi.

Dimapur nung Mahaveer Jayanti mamong

Dimapur, April 14 (TYO): Dimapur nung Jain nungertemi April 6, 2020 nü Mahaveer Jayanti among ta olulu ka social media nung prokshir, ta Mongulbarnü Digamber Jain Samaj, Dimapur-i metetdaksüogo. Jain nungertemi March 24, 2020 anogo nungu Jain temple shibang aser iba anogo nungi

tenzüker lokti mesüra tamangba yimsü dak sendakba sentong kecha magitsü tenokdangba agütsü, ta Tir Omprakash Sethi-ashi. Iba nungji ajemdaker taküm Dimapur nung Mahaveer Jayanti ayonga mamong saka social media nung iba benjung mongogo ta taila osang ka prokshir, ta paisa shisem.



Mongulbarnü Agartala nung Tripura Chief Minister Biplab Kumar Deb-i Dr. B R Ambedkar kürakyanglu nung pa tasoba anogomung tenü nung naro ka yuja akhüm agütsüba sülen sanitizer agi teka merükba noksa nung angur. (Agartala, April 14)

Shillong nung COVID19 tendangtsü atema sample 90 benden

Shillong, April 14 (Agencies): Meghalaya sorkari COVID19 tendangtsü atema sample 90 tashi bendenogo. Health department-i Hombar nikonngtsütsü tashi nung sample 90 tashi bendenogo aser tendangba osang atar, ta Meghalaya chief minister, Conrad K Sangma-i tanü ashi. Bethany Hospital, Shillong nung arishi küm 69 tain doctor ka dak Hombarnü COVID-19 aliba putet aser iba ajanga Meghalaya ajungalen nisungtem petsaprongteper. COVID-19 putetsang den tongteper nisung 200 shi bushitetogo, ta Conrad-isa ashi. COVID-19 shiranger den tongteperem rongnung par kinungerte, par kidang mapa inyakterem aser Bethany Hospital nung doctor aser staff tem dena lir, ta paisa shisem. March 22, 2020 nungi Bethany Hospital semdangertem dang sorkari tenü agütsütsü atema metetdaksüogo, ta Conrad-isa metetdaksü.

Assam nung COVID-19 alir nisung 31 jungogo

Guwahati, April 14 (Agencies): Assam nung nisung ka dak coronavirus tejangja tendangteta, tang state nung iba COVID-19 aketer nisung 31 jungogo ta osang metetdaksü. "Tang state nung ano nisung ka dak COVID-19 putetba ya Nizamuddin Markaz sentong nung shilem agir arurtem dang nungi menazükba lir" ta Assam Health Minister Himanta Biswa Sarma-i ashi. April 13, 2020 nü Minister Sarma-i iba osang ya Twitter nung metetdakja liasü. Sarma-i ashiba agi, iba nisung ya Goalpara nungi lir aser Nizamuddin Markaz nung adener nisungtem shirnok dak iba virus aliba puteta liasü, parnok dak nungi pai menazük. Mongolbar tashi Assam nung COVID-19 aketer nisung 31 rongnung, Golaghat district nungi nisung tuku, Goalpara district kübok Nalbari aser Morigaon nungi nisung pezüzü, Dhubri district nungi nisung asemsem aser Salmara, Kamrup (Metro), Kamrup, Karimganj, Lakhimpur, Cachar aser Hailakandi district nungi nisung ka ka densema lir. Hailakandi district, Assam nungi shiranger ka iba tashidak ajanga April 10, 2020 nü asü, ta Minister Sarma-isa metetdaksü.

Shillong nung shiranger ka kichiba nungi pongzüker asü

Shillong, April 14, 2020 (Agencies): Mongolbar anepdang, Shillong kübok Bethany mozüki nung anepalur shiranger ka pa sasa taküm agi, ta osang ajanga metetdaksü. Arishi küm 26 tain shiranger ya taoba hopta iba mozü kidang anepalutsü anioka liasü. Pa amungba ward indang kichiba nungi pongzüker asü, ta hospital kettangsertemi ashi. Shirangsang ya South West Khasi hills district kübok Mawkyrwat tesem nungi liasü aser pa tsükba tesem nungji dang atanga asü, ta kettangsertemisa ashi. Pai pa sasa taküm agiba ya indang kuli kecha mangu lir. Hombarnü, iba mozüki nung inyaker senior doctor ka dak COVID-19 aliba putetba sülen, iba mozüki nungi shiranger kati pa sasa taküm agiba osang angazüker. Tang iba mozüki ya kettangsertemi shibangja lir aser quarantine centre ka kümogo. Iba den külemi, East Khasi Hills district kettangsertemi Mongolbar anepdang nungi tenzüka Shillong aser iba jila meketa aliba tesemtem ghonda 48 atema curfew agüja lir.



Mongulbarnü Dibrugarh kübok Khanikar nung Assam Chief Minister Sarbananda Sonowal-i temporary destitute shelter ka nung alir nem chiyungtsü lema agütsüba noksa nung angur. (Dibrugarh, April 14)

April 30 tashi Mizoram shibangtsü

Aizawl, April 14 (Agencies): Mizoram Chief Minister Zoramthanga-i April 30 tashi state shibangtsü atema telemtetba agiogo. Taruba anogotem district balala shia tenokdangba balala agütsütsü. Ibaji tensa apir agütsütsü, ta Zoramthanga-i ashi. Chief Secretary Lalnunmawia Chuaungo-i anir state-level task committee kati teinyaktsütem latettsü. Mizoram Chief Minister-i council of ministers, kettangsertem, police kettangsertem, arogo, yimten teloktem aser NGO tem den senden ka amendang state shibangba mapang ashi. atsülangtsü telemtetba agia liasü. Coronavirus prokshiba azüoktsü atema ozüing tesashi agütsütsü aser inter-state o international arrtsülen security akangshitsü, ta Mizoram Chief Minister-isa metetdaksü. Hombarnü Mizoram nung nung tanabuba dak COVID-19 putetba osang metetdaksüogo. Mumbai nung arishi küm 26 tain tetsürila dak positive puteta liasü, ta Mizoram chief secretary Lalnunmawia Chuaungo-i ashi. La ya Mumbai nung aliba mozü ki ka nung isolation nung yur anepaludar, ta paisa mapang ashi.

PM Modi-i Lengyan enokba atema Manipuri nungeri pelar



PM Modi-i Lengyan enokba atema Manipuri nungeri pelar.

Guwahati, April 14 (Agencies): Mongulbarnü Robert Naorem-ia "Pai Prime Minister Narendra Modi-i linük den jembidang mask enokba atema Manipur nungertem kanga pelateper. Tanü Modi-i Manipuri nung sobaliba scarf "Lengyan" ka enoka liasü aser iba ya Meitei nung asoshi akhümket scarf ka lir. "Prime Minister Narendra Modi-i Manipuri Meitei Lengyan amshiba atema kanga pelar. Iba ya sobaliba kanga pelar. Pai iba scarf enokba ajanga NE aser talisa Manipur meimba sayur" ta Manipur Chief Minister N Biren Singh-i Twitter nung metetdaksü. "Prime Minister-i khenkhen Manipuri nungertemi linük atema arrtsü anüker ta ashir" ta Act East Policy Committee indang convenor, RK Shiva Chandra-i ashi. "Prime Minister-i iba mapa inyakba atema pelar. Pai lengyan agiba ajanga linük arrtsü anüker ajak pai meimba aser akhümsübuba sayur" ta Chandra-isa ashi. Manipuri fashion designer Robert Naorem-ia "Pai Manipur nung sü atakba sobaliba agizükogo" ta ashi. "Prime Minister Modi-i lengyan enokbaji kü atema kanga ulura lir" ta Naorem-isa shisem. "Iba ya Manipur nung dang masü saka sü atakertem pusemba lir aser iba ajanga parnok maneni ajungmesotsü" ta paisa metetdaksü. Ano külen, Manipuri folk singer Lourembam Bedabati-ia Modi dang pelaba metetdaksü. Congress spokesperson Ningombam Bupenda Meitei-ia "Prime Minister Narendra Modi-i onok Meitei muffler enokba angudang kanga nüma atanger" ta metetdaksü. Lengyan ya Manipuri teburtemi kanga enoker aser iba ya sentsü balala amshir. Iba ya Manipuri nung kiyimba sentong nung kanga amshir. Prime Minister Modi-i aiben Assamese nung sobaliba gamosa enoker aser tanü lengyan enokba ajanga nisung aika süngmangdaksüogo.



TIR YIMYIM

YIMOBILEM (EDITORIAL)

DIMAPUR RASEMNÜ, RONGCHII (APRIL) 15, 2020

Benjong lima nung ajeptsü

Nagaland nungbo tang alima tashidak wara covid 19 agi shiranger asü masüar tendangdak maka nungji, temulung melemi bilemba nisungtem dak nungi azü tuzüka tangaleni yoka - yoka, joko tangbo temang dena Guwahati Medical College Hospital-i yokba angashir, kechiyong asen lima nung iba ama timtemji anepalu mesütetter. Iba osangji alimai angashia, joko social media platform tapu balala nung tangari asenok menütsüba angur. Asen jakla aser mapa dak alang tilutsür aser sensatsür asünungji, tejak angüma lur hau ta bilemstsüba dak alaka kecha o inteptsüsa madoker. Item tilutsüba o tem rongnung asenok ajak temulung atangtsüba o kaji, Nagaland nung alirtemi benjong onsara sapuba agi benjong monga lungsuteptsüba dak alaka parnok mozü kitem agi mozü kitem mesüka yanglutsübo mebilemer ta chidaksüba o ji asütsü. Iba maksü o jibo yimsüsür aser tulurtemi dang masü saka nübortem ajak kasasa lemsaa chiogo. Tanü tangari asenok meyong mozü kidang asenoksasa asen dak aketba tashidaka metendangtetsüsa aser anepalu mesütettsüsa timtemba tia ngur menütsü dang, asenok jaksajaklema hornbill benjong tuluba-a ta aser yabo hornbill benjong tilaba-a ta chiajema mongtepbato taaktsüka bilemtetter. Asenokbo teti tangar menüdong asütsü na ? Tangari Nagaland nung gari lenmang ngur menütsüba manendang, ano parnok ya mozü kia maka asüa ta repangteta menütsür. Iba denji ano tangarang asen limai kaketshisatsü bushii arutsüsa inyaktetter alitsü melen asenokang takaba ajak chirnurtem tangalen kaketshisatsü bushiba nung endoker. Ya koda ? Asenokbo gari lenmang tajung yanglutsü, kaketshisatsü tajung angudak tesem ka akümtsü aser taneptsü tajung angudak lima asütsü merangtsü melen pei mapa aser pei anguba den mesütep pei atema ali tuluka alitsü, ki tululu anasemkabo yanglutsü aser lenmang mejungaka garibo tajungtiba alitsü nükjidongang asütsü. Asenok joko rongsen agi tenüpkokadokerji, tang ama kenüyongi ajak remoka asütsüba wara anema raraba tongpang nunga, ashiko, peibo meshirangtsü amai bilema pei agitsüang bilema yangku semer awazüa alitsüa akok. Tang yabo, joko, tongpang ayongzuka yur rarar asünungji, pei li aser pei kiji masü saka tashidak ya nokdangteter asü masü ta asüba nung shisatsü, rongsen aser tashi ajak agütsütsüba mapang lir. Ajisüaka, shiranger anepalutsüpurtem doctor aser nurse-tem asoshi dena oset tajungtiba bushia agütsütsü melen jenjang dalangba apia agütsüra, shirangertem dang nungibo doctor aser nurse-temjiang tama süa adoktsü. Aji shibai menoktsü ? Iba ama tensa mapang yabo pei taküm dang masü saka tangar taküm dena tendanga pei agitsü mebilemi inyaksüba mapang lir. Tang amai lira, asenokbo iba tashidak agi atong nungbo mozü kidang inyaktertem ajak den asenok ajak pei kidang aser yimdong nung aksüra wara arudang aktem mepitepa asüba ama, mang aremer-a mali ajak süa adoktsü. Iba taji asenok ajaki yimdangi arua bilemdangdi. Aji oda, tang yabo tangar indang chitsütsü bilemstsüba mapang masü saka pei meyong ali kimonga dena yoker mozü ki nung nungdakbatem asoshi tenla agütsütsüba mapang lir. Joko, asen lima ya benjong lima-a ta asenbo kecha maka ser jaksajaklema senzüba to, khen, tesülen yutsüdi aser asenok taneptsü angudak mozü kitem tama yangludi. Iba ama tangari asenok menütsü dang Nagaland Medical College indang khen süoki ia bilemdangdi. Atangji, kechiba benjong mamongtsü saka benjong mongmonga asenok shirangdang azü tuzüka tendangdak government mozü ki kata mozü ki mesüka melira, kaketshisatsü shita angudak kaketreju makara, anogo anasemka among ajak shibanger among nung chiyongtsü maka "relief jang" agidang taküm alitsüsaba jenjang nung asenok lira, asenok kentena tsüngsanga yartepa amongba benjongmong ajakji akümmaket temenünütsüka dang asütsü. Tanü ama tensa ka nunga nübortem asoshi masü pei agitsü dang bilem nungbo, atangji, asenok ajak benjong monga monga ajeptsü.

OLEMSABANG

LOKTI TEKÜLEM MENUNGRADAKTSÜBA: COVID-19

- Rev Dr Mar Pongener, Clark Theological College

Germany nung 1919 German Workers? Party ta sür nationalist (pei kin aser yimten asemertem) telok ka tentet. Iba sülen Adolf Hitler-i anir February 24, 1920 nung Nazi Party tentet. Iba party ajanga inyakba mapatem aika asenoki otsü nung azünger. Adolf Hitler lenisüba kübok Nazi Party yimsüsüba merena aküm. Talisa 1933 nung pa Chancellor akümba sülen, Germany nung kinren (racialism/racial) bentet benteta ayutsü asoshi inyak. Pai German nungerji temeruk shilo (purity of the German Aryan Race) saka tangar talisa Yihuda nungertemji tekübokba (inferior) shilo aser memerükba azü nungi jakzükbatem ta züngshi. Iba mapang Yihuda nunger yongsük 525,000 shi Germany nung liasü. Küli aika rongnung kechiba Hitler-i Yihuda nunger mesakloki aküm ta süra, pai Yihuda nungerji lokti menendaksüba mesen aser Germany nunger rongsenketsüng (economy) raksadaksürtem ta tonglokja parnok dang "second-class citizens? ta aja. Iba yongji Hitler-i tekaratiba nung Yihuda nunger ajak samadaksütsü tasa tamajung aika asa. Yamaji, 1933 nungibo Yihuda nunger Civil Service, University, Court aser mapa balala nung inyaka alirtem ajak ozüng agi anendaksü. Yihuda nungertem school nung azüngtsü memela, lokti senden balalai aotsü nokdang, parnok meyong rongsen ajak rakzuka ayu, parnok nem shishilembaba mapatem kecha meinyakdaksü aser parnok aliba ki ajak raksaja rongdoktsü. Talisa Yihuda nunger indang Synagogue (tekülemdak/ozüng azüngdak aser angazükdak) ajak rongdoktsü. Yihuda nunger telok senteptsü ozüng agi memela. Aika tepüokdak ayu, chiyongtsü peria magütsü, tazükba aser reshikangshi tali den mapa tali agütsü. Iba ama tensa ka nung Yihuda nungertem telok sentepa Tsüngrem külemtsü tamakoktsü aküm. Aikati miima laishiba azüng aser ola madoki temulungjang nung ken tena Tsüngrem külem. Covid-19 wara ajanga tanü lokti tekülem magitetsüsa kümdaksüba den mesükteper. Parnoki lokti tekülem nung shilem agia, ken tena aser lai zünga aruba mapangtem nüklai arua menungrar alitsü, saka itemji meinyakteti aika taküm tatembang aküm.

Tsüngremi lokti tekülem (corporate worship) meimer. Pa dak amangertem sentepa külemba nungji Tsüngrem temulung achir. Iba indang lai tesayubatem Rom 12:5; 1 Korint 10:17; Efesa 1:22-23; Ibr 10:24-25; T. Mapa 2:42 nung tejangja shia lir. Anungji Tsüngrem chirtem (1 Yohan 3:1) külemi sentepa Tsüngrem külemtsü jangra-a bilembaji tim lir. Lokti tekülem nung kati ka ajungshir, tanela nung tashi itshidaksür, tejangraba tali adokdaksür, kati ka nungi angazükteper, zükla-a oya alidang kati ka tashi itdaksür, külemi ken atenba, lai azüngba aser sarasademba ajanga tanela tejangraba züindaksür. Anungji Tsüngrem chirtemi lokti tekülem jangra-a aser menungra-a bilembaji laishiba tesayuba ta angatetdi.

Ya bilemtetter! Covid-19 wara menatepba aoba nokdangtsü asoshi Prime Minister Narendra Modi, March 24 nü nationwide lockdown anogo 21 alitsü sangdong. Iba tashi nung Naga limabo temtem kangabo masütsü ta aikati bilemogo saka tanü asenok tematemba asangsang nung ajangshia arudagi. Kaket reju, office, dokantem shibangba aser senzusempongtsü nokdangba tashi nungto "anogo ishika atemabo kechia masüar? ta züzüa bilemteper. SAKA kodang lokti tekülem magitsü tetuyuba agütsü iba mapang nungi tamangertem ola adoktsü tenzük. Kodaser tekülem sentep shibanger? Kechiba Tsüngrem külemtsü nokdang? Sentepi moi koda alitsü? Waraji menatepa aotsüsa süaka lokti tekülem agitsü aser aotsü ta asenok aikati bilema jembiogo. Atangji ya shitak, kechiaser tamanger kati lokti tekülem nung shilem agia Tsüngrem külemtsü jangrabaji tangatetba tajung. Iba ama tesasaba ola angashidang, auni! Aori Tsüngrem meimer ta angateta haliluya! ta aiben shiogo. Joko hapta asem shi lokti tekülem magiteter, ano lockdown atsülangba ajanga aika mulungjang nung LOKTI TEKÜLEM menungraba tanela tali jangrudagi.

Arung, ken aroka shisadangdi! Anganüaka manganüaka, Covid-19 wara marudangbo tamangertem aikati lokti tekülem sentep memenungrai lia aruogo. Tenla Ki tululu tepur junga yanglua ayu. Furniture tajung agi yanglur Temeshi Sapang (lectern) anasa tapet naro metener ayu. Tekülemertem temtim makai angatsü asoshi sen aika indoka sound system tajung alia ayu. Sentsüa adoka meyteter carpet tajung lema ayu. Tip külen Pastori anir arogo tenzükertem aser tip külen arogo choirtem amentsü menden renemer ayu. Tekülemertem anisüngzuka amentsü asoshi menden tarensen (row) 4-10 tashi yanglua ayu. Chowkidar-i mapang shitak nung ding-dong! ding-dong! ta sarasadema tsüngtsüng temloktsür. Arogo tenzükertem aser Pastor mulungjang nung tekülemertem jangrabangra arudakjang ta sarasadema atar. Tanela tejembiba nung ajemdaker Pastori Tsüngrem O ashitsü renemer atar. Mapang shitak nung arurtem ishira. Tanabenbuba tsüngtsüng temloktsür külen ishika arusem. Lokti tekülem nung shilem agitsü jangraba pur ishira kechiaser imlaba ama tekülemertem maru. Pei kidang TV nung serial balala reprangdang, nungdak balala asoshi senzüdang, shishilembaba mapa mazüngi inyakdang, azümesena yipden nung mangadaker alidang tsüngtsüng ola menungra-a mebilemtet. Pastor aika den tenyaba mapa khuret lemsatepdang tamangertem tekülem mejangraba khuret indang nüksü yima lemsateper. Kechiba Aor tamangertem tanela jenjang yamai pongpa-a akümer ta lemsateper. Lokti tekülem mejangraba asoshi kati ka aitsütepba dang amanga lia aotsü asü? mesüra tamanger shia "lisem ma nung ki asüba? tamashi nisung mesüka masü saka "lungma nung yangerba ki? (Mathi 7:24-29) mesüka Tsüngrem dak tamang takang yur amanga aotsü? Yihuda nungeri menungra-a bilemaka, Nazi Party yimsüsüba kübok lokti tekülem magitetsüsa akümba mesüka, Covid-19 ajanga asenoka iba jenjang yagi bener arutsüogo. Iba ama mapang ka nung tanübo asenoki lokti tekülem menungra-a bilemer. Tenla Ki tepur tajung nung mener külemi ola tashi agi adoka, longso longsoa ken tena, lai zünga sarasademba mapangtem menungrar. Pastori Tsüngrem O jembiba agi lakogo ta jembia aru, saka tanübo Pastori jembiba ola aser pa/la tejak menungrar. Arogo kar nungbo Pastori media balala ajanga sermon yoktsü anungji pei kidang mener itemji angang ta shiaka, tenla ki sünga nisung senteper. Atangji Covid-19 ajanga Tenla Ki aser lokti tekülem menungraba tanela ka bentsür aruogo. Tsüngrem tenung sangdi.

Adianutem, asenoki Tsüngrem dang mepiba ama Covid-19 wara koktetsü. Iba temtim mapang tembangtsü. Arishia toktsüra Tenla Ki aser Lokti Tekülem menungraba tanela ya remsepba meyokli. Tekülemi aoba agi alakba indang mejembili. Tsüngremi apuoktsüba tanela O Pastori jembiba agi melakli. Pastori aiben tekülem nung tashi aitsü indang meshidaksütsüsa lidi. Tsüngrem lartem mulung meraksadaksüli. Tekülem mapang kati ka aitsütepba, kati ka dak tashi mait aser tamajung ajiteta Tsüngrem külemba yimya indokdi. Tsüngremi asen tamang aginer. Yisui tetsürla dangji ashi, "Ne tamang agi na kümzükogo, tesünep nung oang" (Luk 7:50). Tsüngrem dak tamang akanga yudi aser sentepi monüi tezü tanga bilemdang Covid-19 bilemtetdi. Covid-19 wara kokteter külenbo tepur tajung Tenla Ki tululu süzüka aliba nungji longso longso-a mener Tsüngrem külemtsü sarasadema yongya-a atadi. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

MANENI SARASADEMANG (1THESA.5:17)

Temiem adianutem,

Alima nung shisabulu aser timtem khuret atema asenok ajaki külemi temolungjang ka kümer sarasademba mapangji tang ya ka lir ta bilemer aser ya shingaia ayongzükba sentong ka masü saka Tsüngremi ataloktsüba mapang ka ta bilemer. Anungji iba senti mapang tajung kong asenoki Kibuba Tsüngrem den shisabulu khuret ajak lemsatepteter item ajak asoshi Pa nem tenungsang agütsüdi.

Tanela asentenshi(spiritual awakening) mapang nung teti keta aliba sobutsü (jakla,yimya),kaji sarasadem ya lir. Shirnok iba Revival sentong nung tendir ajaki sarasadem,hau,aikati ola kanga atoka sarsadem aser ano karibo ola madoker saka temolungjang nungbosa sarasadem kechiaser iba ya tanela temeshi agi jakdaka mapa inyakba mapangji lir.Kechiba sarasadem ta surapang tanela temeshi agi mapa inyak nung nisung ajakji ajemalua akümer aser temolungjang ajemaluba temaitsüji sarsademba jagi shisangdaksür.Aser iba ajemalu sarasadem ajanga nisungtem aika taküm nung temelenshi atokdaksür aser ibaji temoatsü küma wadang nung takok angur,kibong nung tesunep arur aser Arogo nung tanela temeshi tashi tuluba akümer aser yimten aser lokti palala nung ozüngji ochishia kümdaksür.Kechiba Revival mapang sarasadem ta surapang Revival ya sarasadem ajanga adoker - nisungtemi kodang kangadang sarasademdir Revival akatsüsa akümer aser sarasadema sentongji tempanger,ano neburtemi sarasadema khristan takümüji jajar.

Sarasadem ya asen Chuba kümtedakba Yisu Khristai pa taküm rangben agi sayu. Iba lima nung pa tebu Tsüngremi tenyaba mapa renemtsü tenzükdang sarasadema aser lumia tenzük aser ano aonung, anepdang, nikongdang mapang ajak nung sarasadem tashi nung inyaka arur külen joko tatempangleni arudang Gethsemene atsüki nung sarasadem aser tatemsa kangki nung sarasadema tempangba asenoki meteta lir.Anungji Yisu Khrista wadangi Revival agi sunga liasü kechiaser pai wadangi sarasadema inyak.Sarasadem ya koda tongtipang aser tashi tulu lir. Reprangang,laishiba nung Lipok kaket nungi tenzüka jungkai adok tashi nung tatalokba otsütemji reprangra tesungmangtsü tatalokbatemji sarasadem ajanga adokba asenoki angur.

Temiem adianutem,

Asenoki joko 2013 nungi tenzüka küm ishika kanga dang nendaka asen lima nung aser neburtem rongnung Tsüngremi molungba Revival ka adoktakjang ta sarasadema arudaki aser iba Revival ya miemchirtemi aginuba ama yangluba ka masü saka Tsüngremi molungba ka atalokdakjang ta pa ket nung bendanga agüja sarasadema arudaki anungji Tsüngremi pai molungba ama yimya palala agi neburtem rongnung Revival adokdaksütsü aji asünung asenoki ano maneni dang nendaka sarasademdi.Tsüngremi Pa dak amanga mepishiba nung nuktsü ayimba kodanga amajok mekümdaksütsü.Tetenzük nungi asenoki koda sarasadema arur iba tongpen to mamadoktsü aser ano iba den Tsüngremi tanü tendak ne dang kechi khuret sayur item atemaji ta maneni dang sarasademsü ayongzük.Shiba den Tsüngremi jakdaka jembir aser ano shirnok dang Tsüngremi onük palala sayur rempanga meyui külem ongorurtem den lemsatepa sarasademsü ayongzük.Maneni ya shiner iba ya Kibuba den sarasadem nung lungjemtsü kanga dang mapang tajung ka ta agizüka maneni sarasademtepti ta ayongzük.

Sd/-
Rev.C.Teyong Kichu
Latter Rain Revival Sarasadem Telok

ANO GO ABEN TSÜNGREM DEN

SÜNGJANG TAJUNG ATANGBA

Süngjang tajung talubusa atangtsü asoshi tzü tajung tapari nungdaker. Yamaji kü taküm nunga süngjang tajung atangtsü asosh ini tanela chiyongtsü koba tashi ka achir, iba dakji keta lir. Iba indang tenüngsang ken zülur jagi yamai shia angur, shibai Kibuba ozüng nung jangra atemer, pa mesüra laji ayongkhüm nung tejang tangtsür (T.Ken 1:1-3). Tenyar Paulia Galatia 5 nung, shirnok Tanela nung jajar parnok dak temeim, tepela tesünep, taremsük, kümli tajung, ajemalu, pei sasa azüokba, item tanela süngjang atanger ta shia angur (tk. 22-23).

Khen khenbo ni jembiba otem aser kü mapatemji temeim meteni jembishinüa inyaker ama ni bilemer, aser iba jagi süngjang tamajung tangdaksür. Süngjang tamajung atangbaji, ni Tsüngrem O shisadanga nung mapang peria mindokba ajanga adokba lir ta shisatet. Anungji kodang ni Tsüngrem O nung tera yanga alitsü merang, idangji kü dak süngjang tajung atangtsü tenzük. Taremsük aser temeim agi ni tangar den jembishinütsü mulungtet.

Tsüngrem shiba asenok dangi jungkai adok, Paji asen asoshi tashi, shisatsü, tepela tesüngep, tangatetba, aser yimjung adokdak lir (T.Ken 119:28, 98, 111, 144, 165). Tsüngrem O nung jajaba ajanga asenok Pa anasa tali aor, aser Tanela Temeshii asen taküm nung mapa inyakbaji jangja jangjaa metettsü.

Tazüngtsü: Tenüngsang Ken 1:1-3

Iran linüki tepoukdak alir Khristantem aika chiokogo



Iran yimtiba, Tehran nung aliba UN office kima Iran nung Khristan aser Muslim nung naprongla longjemer, Iraq nung Khristantem reshikangshiba anema longlak aitiba noksa nung angur. (file photo)

Tehran (Iran) April 14 (Agencies): Iran nung aliba tepoukdak balala nung Coronavirus tashidak proktsü tsübuba agi Iran ketdangsertemi Khristan aika tepoukdak nungi chiokogo.

Islam yimsü nungi Khristan yimsü dangi meyipertemji tepoukdak nungi chiokba ajanga aika pei kidang Easter Sunday mongogo.

Khristantemji aikati Islam yimsü dangi tanaben meyiptsü memelungba ajanga parnok kanga reshikangshia liasü, ta Khristantem osang ka ajanga metetdaksü.

Parnok rongnung nisung ka tenüng agi, Amin Khaki-i pa joko tanaben tepoukdaki

maotsü, ta ashi, ta advocacy group Middle East Concern (MEC)-i metetdaksü. "Joko pai security sen agüja alibaji meyipa memeshitettsü," ta MEC-i ashi.

2017 küm December ita nung Iran kübok Rasht yimti nung security agent temi ki balala mita aoba mapang nung Khaki den Khristan pezü pua liasü.

Yaküm court nung ken o angadanga mapang nung, sorkar anema osang tiyazü prokba aser kidang tekülem ki amenoker tekülem agiba atema aija pa ita 14 tepoukdak ayutsü obendang agütsü, ta MEC-i metetdaksü.

Tanüngba Khristan pezüpronglaji ita pezüzü

tepoukdak ayutsü obendang agüja liasü.

Taoba mapang Muslim nung pezüjibo tepoukdak ita pezü abensar yaküm October ita nung chioka liasü. Tepoukdak coronavirus tashidak proktsü tsübuba agi ketdangsertemi Khaki bo taoba ita tatemlen chiok saka pai security sen US dollar 3000 agüja liasü.

Pa jakdang Khristan ka tenüng agi, Rokhsareh (Mahrokh) Ghanbari-a chioka liasü. Sorkar anema jembiba, ta tai tonglokja la küm ka piyong tepoukdak ayutsü obendang agütsür liasü saka ibaji mabensadangyongi la chiok.

Rokhsareh (Mahrokh) Ghanbari-i bail atema US sen

2000 agüja lir aser lai iba senji meyipa angutsü imlar. Yaküm US tatong Tir, Mike Pence-i arishi küm 62, Ghanbari chioktsü akhangba ajanga la tenüngji aikati meteta aküm. Mike Pence-isa Iran nung Khristantem yaritsü ta sangdonga liasü.

Ano Iran nungsa Muslim yimsü nungi Khristan dangi meyiper aika tepoukdak nungi khenpiga atema 'leave' agütsüogo. Linük nung aliba jail balala nung coronavirus tashidak proktsü tsübuba agi Iran-i tepoukdak alir 85,000 tashi chiokogo aser parnok rongnung Khristantem aika densema lir.

Parnok rongnung küm 5 nungi küm 10 tashi tepoukdak ayutsü obendang agütsür alir Khristan 10 densema liasü. Arishi küm 42, Yousef Nadarkhani, Mohammad Reza (Yohan) Omid (46) aser Zaman (Saheb) Fadaei (36) nungeri aiben bail nung chiokang ta mepishia liasü.

"Ano arishi küm 58, Nasser Navard Gol Tapeh'er kinüngertemia pa dak temang nung timtem jenti lir anungji chiokang ta mepishia liasü. Tatamsa February ita nung tanaben ken o angadangtsü melunga liasü," ta MEC-isa metetdaksü.

Tang tashi tepoukdak alirtemji Mohammad Ali Mossayezbaze, Abdolreza

Haghnejad, Shahrooz Eslamdoust, Babak Hosseinzadeh, Mehdi Khatibi aser Behnam Akhlaghi nung lir.

Iran nung Khristantem tawa tepoukdak nungi chiokba Khristantem security sen meyipa angutsü atema sarasademsüdar.

Iran nung Khristantem linük nung coronavirus tashidak anema raratettsüsa Iran ketdangsertem nem shisatsü agüjang ta sarasademsür.

Iran nung tang tashi nung nisung 71,686 dak coronavirus tashidak putetogo, aser iba tashidak agi asür ajak agi 4,474 jungogo, ta Kianush Jahanpur-i (Public Relations and Information Centre of the Ministry of Health & Medical Education) metetdaksüogo.

Tang tashi nung linük nung nisung 263,388 dak coronavirus tashidak tendangogo.

February 19 nü mezüng Iran linük nunga iba tashidak puteta liasü aser Middle East nung iba tashidak agi tamajungtiba kongshiba linükji Iran lir.

Iran nung ketdangsertemi Khristan densema minority tem anema meinyaker saka Islam sobaliba wazüka ayur ta ashir.

Nütsüng million 82 aliba Iran linük nung Khristan nütsüng 360,000 shi lir. Linük nung aliba Khristantemji aika tamalen Islam yimsü amangertem lir.

OLONG PAITEP # 5428

	1			2		3		4
5						6		
7			8					
						9		
		10						
11								12
				13				
				14				
15								
				16				

TIPIEN		LANGTSÜNGLEN	
1. Balaka	- (5)	2. Hai sür inyak	- (4)
6. Aika shirangba	- (4)	3. Aor tenüing ka	- (6)
7. Tar tatsü	- (6)	4. Ali telungi talangka lur	- (5)
9. Nenü'er jabaso	- (4)	5. Tebang kenyongi mazüoker	- (4)
10. Sen latettsüba	- (7)	8. Ken atema anenzükertem	- (5)
11. Tangar kübok alir	- (4)	9. Toktepa noktak	- (5)
14. Lon nung inokba	- (6)	10. Sen	- (6)
15. Tzü ayimdak	- (4)	11. Benjong agi	- (5)
16. Ajok	- (5)	12. Telung nung rizünga ayu	- (4)
		13. Tebang nung enok	- (4)

OLONG PAITEP # 5427 TELANGZÜBA

TIPIEN :		LANGTSÜNGLEN :	
1. Aben, 4. Artsü, 7. Lisem, 8. Liwa,		1. Aruli, 3. Balala, 5. Suwar, 6. Belem,	
9. Sarasadem, 12. Aket, 14. Mangu,		9. Sүjak, 10. Aonung, 11. Dokan,	
15. Anünü, 16. Ango.		13. Tinu.	

MOKOKCHUNG DISTRICT COVID-19 IMPORTANT NUMBERS


- DISTRICT ADMINISTRATION**
- DC Control Room: 0369 - 2226231, 8131836575 (WhatsApp)
 - Essential Commodities enquiries: 9612874711 / 9436627532
 - Food bank (if any one wishes to donate to the needy)
: 8131929284 / 8414853788
 - Email : dcmok-ngl@nic.in
 - Website : mokokchung.nic.in
 - District Disaster Management Authority
: 0369 - 22251031 / 87318 89309
 - Community Kitchen: 9774616981

- MEDICAL**
- Control Room : 7628854582 / 7630007954
 - Clinical Psychologist Team: 7005397640 / 8413030430 / 8787475779

- POLICE**
- Superintendent of Police : 0369 - 2226207 (0)
 - SDPO Mokokchung : 0369 - 2226220
 - Police Station-1 Mokokchung : 6009380967 / 9485232688
 - Police Station-2 Mokokchung : 6009398309 / 9485232689

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüing :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :


TANÜBO NAI LANGZÜANG

Q. Koba küm Khadi and Village Industries Commission (KVIC) tenzük?
 A. 1957 B. 1960 C. 1963 D. 1983

_____ (Taruba adok nung onoki langzүsү)
YASHI ADOK TELANGZÜBA : Ladakh

NAI-A YA METETTER MA?
INDIA NUNG IT COMPANY TEMATIBA 10: 2020

- Tata Consultancy service
- Infosys
- HCL Technologies
- Wipro Limited
- Redington India Ltd
- Tech Mahindra Ltd
- Larsen & Toubro Infotech Ltd
- Mphasis Ltd
- Mindtree Ltd
- Hexaware Technologies Ltd



SUDOKU # 5470						TELANGZÜBA # 5469								
			1	7		3	5	7	4	9	8	1	2	6
					8	6	8	1	5	3	2	4	9	7
3		5			8	4	2	9	6	1	7	5	8	3
8	1					7	1	3	8	2	5	6	4	9
9	7			8	6	2	9	6	1	4	3	8	7	5
					9	5	4	8	7	6	9	2	3	1
6	4			9	3	8	3	5	2	7	1	9	6	4
					7	1	7	4	9	8	6	3	5	2
					8	9	6	2	3	5	4	7	1	8

OJANG LUTEP # 5018

IMALAR :
 EN TSA :
 MAKOKA :
 ONGAOYJIA :
 ENASI :
 NGDA :
 ANGRMAA :
 ÜNGTSREMI :
 AOKSEN :
 TSZÜKÜMKÜ :

OJANG LUTEP TELANGZÜBA # 5017
SHI AZÜ NUNG DANG MASÜ SAKA TANELA NUNGA SAKSALEMA ALITSÜLA

TAN HOPTA ATEMA - KOMA SÜLA ?

Q. Nagaland nung alirtembo joko pei mapai akhi ama aotsü saka ano ita ka Nagaland alema shinga maotsü aser Nagaland-ia shinga marudaktsүtsү ta asununga koma süla ?

Olong 20 shi nung April 17, 2020 tashi nung iba telangzүba ya onok dangi (e-mail - tiryimiyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzүbatemji taruba Honibarnü adoktsүtsү.



New Delhi, April 14, 2020: Ato Kiloner Narendra Modi-i video link ka ajanga linük nem osang agütsüba noksa nung angur. PM Modi-i linük ajunga maneni May 3 nü tashi mokdanga ayutsü sangdongogo.

Tarutsü tajungba ka asoshi timtem karbo aremtsüla: Venkaiah Naidu

New Delhi, Rongchii/April 14 (Agencies): Ato Kiloner Narendra Modi-i May 3 tashi maneni linük mokdanga ayutsü sangdongba sülen ghonda ishika lir Mongolbarnü Vice President M Venkaiah Naidu-i, tarutsü tajungba ka asoshi tanü linüki timtem tekangshi karbo aremtsüla, ta ashi. "Iba rara kobai ka atsülanga aotsü aji asenok dak keta lir. Asenoki asüng tajungba ka asoshi tanü timtem tekangshi karbo aremtsüla. 'Lockdown 2.0' ajanga asenoki aginüba ama tensa yanglutsü asoshi joko nüburttem kabuma nung lir," ta pai tweet ajanga ashi.

Paisa nüburttem dang iba tashidak den raratsü asoshi tali bendanga agütsüshir nokdaksü ayongzük. "Tensa apir PM-i osang agütsüba ya lenmang ajak dang tajungtiba lir. Ato Kiloneri linük nung tekübökbaba jenjang nung alirtem libaliro kanga junga asadangogo aser takokba tashi tajungtiba nung teyari agütsütsü nangzükogo. Aluyimertem aser farm nung inyakertem densema tekübökbaba jenjang nung alirtem ajangzüktsü asoshi sorkari jenjang tapet benoka inyaksü ni imlar," ta vice president-i ashi. Mesen prokshia aoba aser inyaksangshi nokdangtsü

asoshi tetendangba mapang nung nüburttemi kechi koma inyaksangshir iba dak ajak keta lir ta nüburttemi angatettsüla. Paisa, asen linüki tang tashi kanga junga inyaksangshia arudar aser iba dak temulung masütsüla aser 'lockdown 1.0' ajanga ajangzükba idakji metembangdaksütsüla, ta ashi. "Ato Kiloneri tanü linük maneni nokdanga ayutsü asoshi sangdongba ajanga asenok ajak senteper coronavirus den raraba mapang ka nung nüburttem aser stakeholder tem atema süokia bilemba sayur," ta Naidu-i ashi.

AP nung 'YSR Janata Bazaars' 20,000 dak tema amenoktsü

Amaravati, Rongchii/April 14 (Agencies): Coronavirus tashidak prokshi aoba nokdangtsü asoshi linük ajunga mokdang aliba mapang state ajunga nung aluyimertem nem teyari agütsütsü asoshi Andhra Pradesh sorkari yimtsüng aser jila balala nung YSR Janata Bazars 20,000 amenoktsü asoshi sentong yangludar. Chief Minister YS Jagan Mohan Reddy-i tang temaba jenjang nung aliba ketdangsertem den sensaksemdar aser pai ketdangsertem dang iba project nongita yaritsü asoshi agriculture sector nung cold chain aser processing network tem akangshitsü asoshi

inyaksü shiogo. "State nung Rythu Bharosa centres aser village secretariats 11,000 shi lir, koba YSR Janata Bazaars nem teyari agütsütsü asoshi amshitettsü. Iba ya ward secretariats aser Mandal headquarters tem nunga amenoktettsü. Assembly constituency ajak nung cold storage units amenoktsüla," ta state chief minister-i ashi. Tang Bazaar lapoktsü asoshi benoka aliba rasaa ashiba mapang pai ketdangsertem dang, osettem ayutsü asoshi refrigerator amala infrastructure facilities aser anosotsü, mamatzü, süngjanglijang, entsü amala

belenshitsu asoshi gari agütsütsü mepeshi. Iba dak alia tzüyim nung anguba chiyongtsütema belener arua Janata Bazaar tem nung alitettsü ta, pai ashi. Jagan Mohan Reddy-i, ketdangsertem dang bazaar amenoktsü asoshi tesem jangjashitsü tuyuogo, ajita asünungdang kibong kar nembo tenüngdakba osettem agütsütettsü, ta ashi. Paisa, aluyimertem nem teyari agütsütsü asoshi oset jenjangtem Minimum Support Price (MSP) dak ajemdaker yanglutsü, ta metetdaksü. YSR Janata Bazaar project achaayangtsü asoshi IAS officer tejen ka shimtsü.



April 14, 2020 : Linük ajunga mokdang aliba mapang Jammu kübok Narwal tesem nung anosotsü shishilembadak tesem ka tangokba noksa nung angur.

Navlakha-i pasasa NIA nem bendanga agütsü

Mumbai, Rongchii/April 14 (Agencies): Civil rights activist Gautam Navlakha-i pa sasa Mongolbarnü National Investigation Agency (NIA) nem bendanga agütsüogo. COVID-19 tashidak pokteter aliba ajanga pai mepeshiba atsülangtsütsü benokba Supreme Court-i magizükba sülen pa bendanga agütsü, ta ketdangser ashi. Navlakha shiba 2018 küm Bhima Koregaon mepetmesü nung adenba atema Unlawful Activities Prevention Act kübok aitsü, pa dang Supreme Court-i pasasa bendanga agütsütsü asoshi tuyu. Mumbai nung amendaker aliba Economic and Political Weekly journal Editor Navlakha, ya January 1, 2018 nü Bhima Koregaon mepetmesü nung adenba aser

Maoist den sendaktepa lir ta shia apuba, human rights activists pongu rongnung ka lir. Ajisüaka Supreme Court aser Bombay High Court-i pa aputsü nungi tekümzükba agütsü. March 16 nü Supreme Court-i pa dang hopta asem tsüngda bendanga agütsütsü asoshi tuyu, saka pai COVID-19 tashidak pokteter aliba mapang jail-i aobaji tasüi aoer den kasa dang ta shia mapang atsülangtsütsü asoshi mepeshia ken o ka benok. Justice Arun Mishra-i aniba bench kati April 8 nü ashiba agi, aija alirtemi anticipatory bail agintsü asoshi parnoki telemteba agiba akhümtsübuttsü asü aser parnok dang tuyuba ama hopta asem tsüngda bendanga agütsütsü asü. Pai pa anema ken o benokba ka danga magizük.



April 14, 2020 : Tir Ram Nath Kovind-i mask semer Rashtrapati Bhavan, New Delhi nung Babasaheb Dr B R Ambedkar nem pa asoba anogo tetushi agütsüba noksa nung angur.

Rajasthan nung nisung 6,000 dak tema puogo

Jaipur, Rongchii/April 14 (Agencies): Coronavirus tashidak prokshia meyoktsü asoshi curfew benokba aser linük mokdanga ayuba inyakim sülen manidakba atema March 22 nü nungi April 13 nü tashi nung Rajasthan Police-i nisung 6,000 dak tema puogo, ta ketdangsertem metetdaksü. Official data ajanga ashiba agi, nisung 6078 pua aliba rongnungi nisung 5,243 CrPC section 151 kübok apu aser nisung 835 iba tashidak prokshia yoktsü lendong nung aliba atema apu. "Nisung 5,243 CrPC section 151 kübok puogo. Item nisungtem ya timba iba section kübok apu, koba curfew benoka aliba tesemtem nung kecha kuli makai shishilembadak senzüba atema apu. Maneni osang teyazü aser tangar anisatsüsa osang prokshirtema CrPC section 151 kübok aija puogo," ta additional director general of police (ADGP - Crime), Bhagwan Lal Soni-i ashi. Kasa mapang nung police temi Indian Penal Code (IPC) aser Disaster Management Act kübok sections tapettem nung ajemdaker linük mokdanga ayutsü tuyuba sülen manidakba atema nisung 835 puogo. "District administrations balalai tetuyuba aika agütsüogo. Tesem kar nungbo curfew benokogo aser tesem kar nungbo nisung pezü dak tali adenshitsu memelar. Iba

tetuyuba sülen manidakertemi tashidak prokshia yoktsü ana nung lir, anungji iba tetuyuba sülen manidakertem puogo," ta Soni-i ashi. Public servant temi tetuyuba sülen manidakba ajanga tetsükdaksü adokba, yiruyipongba mesera tetsükdaksü adoktsüsa kümra item nisungtem ajak IPC senction 188 kübok pua yutettsü. Alwar (549), Jhunjhunu (402), Jaipur rural (285) aser Dholpur-(277) district tem nungi nüburttem kümzükba ayutsü asoshi kümdangshiba inyakim ka ama nisung aika puogo. Linük mokdanga ayuba sülen manidakba atema Sri Ganganar (86), Chittorgarh (85), Bikaner (62), Jaipur North-(61) aser Banswara (50) district tem nungi nisung timba puogo. Kasa mapang nung police temi gari 74,312 puogo aser MV Act kübok nisung lakh 1.29 puogo aser senchi sen crore 1.76 bendenogo. Garitem ya Motor Vehicles Act section 207 (vehicles used without certificate of registration permit) kübok puogo. Gari timba commercial garitem liasü aser item garitem ya permit melei senzüa liasü. State health department official data ajanga ashiba agi, Rajasthan nung coronavirus tashidak keter alir nisung 969 lir aser parnok rongnung nisung 441 Jaipur nungi lir.

Rakhine state nung nisung ti tepset

Rongchii/April 14, 2020 (Agencies): Hombarnü Myanmar indang Rakhine state nung injang-bomb tesashi khaloktsüba ajanga nisung ti asü, ta yangji yangji alir ketdangser anati ashi saka mitkartemiba iba tatalokba indang osang kecha maru ta ashir aser parnoki shilem magi, ta ashi.

Ponnagyun jila kübok Kyauk Seik yimtsüung nung nisung asüba ya Reuters news agency ajanga osang magitepteti lir aser sorkar ketdangser ka dangi phone call asüba magizük.

"Northern Rakhine nung khataper, saka yimtsüung ka nung injang-bomb khaloktsüba mali. Tang tashi civilian asüba indanga osang arua mali," ta army odongtar Major General Tun Tun Nyi-i phone ajanga osangbener dang ashi.

Myanmar indang mitkartemi küm ka dak tali Arakan Army (AA) den rara arudagi. Arakan Army yagi Myanmar linük anüolen yimsü asütsü meranger. Rakhine aser anasa aliba Chin state tem nung rara tesashiba akümer, aser iba ajanga nisung aika süogo aser ano maneni nisung meyirijang aika tesem balala nung jenshia lir.

Ponnagyun legislator Tun Maung-i ashiba agi, pai Kyauk

Seik tesem semdang aser nisung ti sür liasü. Iba yimtsüung nungi sorkar ketdangser Tun Aye-ia kasaji ashi. Yimdaklirtemi mitkartem tenüung asener, ta tenaprongi ashi.

Kyauk Seik tesem nung alir Thar Doe Maung-i ashiba agi, iba lendong nung par kinunger asem asü.

Arakan Army-i sangdong ka nung, Hombarnü iba tesem nung par telok aser mitkartem tsüingda kükhatap, ta ashi aser iba tatalokba atema sorkar meyong sepaitem aitsü.

Rakhine central aser northern tsütsü tesem timbai osangbenertem meyoker.

Coronavirus agi mela mela meneptsü aliba kintem kümzüka ayutsü mechi United States aser Britain linüktemi Rakhine state nung rara anentsü akhanger. Myanmar nung nisung 52 dak COVID-19 puteta lir aser kasa tashidak wara ajanga nisung pezü süogo.

Arakan Army den yangji aliba telungpur telok anati tashidak wara mechi April ita ceasefire alitsü sangdong. Saka linük balalai mepishiba mitkartemi magizük aser taoba mapang sorkari rara anentsü sangdongba telungpurtemi mangashi, ta ashir.



Sanaa, Rongchii/April 14 : Saana, Yemen nung April 14, 2020 nü tzünglu kanga sashia aruba ajanga tzümetsüung adokba sülen nisung ka par kima mena aliba noksa nung angur. Yemen yimtiba, Sanaa nung tzünglu kanga sashia aruba ajanga tzümetsüung adokba agi nisung ana taküm samatsü, ta yangji aliba ketdangsertemi Mongulbarnü ashi. Iba yimti nung tzümetsüung agi ki aika dak kongshi aser lenmang aika shibanga lir.



Central China kübok Hunan Province nung Ningxiang yimti nung aliba middle school ka nung mezüung class agiba mapang tesayuri kaketshir dang COVID-19 nungi kümzüka alitsü asoshi yimyatam sayuba noksa nung angur. Ningxiang yimti nung junior aser senior high school nung azünger kaketshirtem Hombarnü nungi school-i tanaben arur.

COVID-19: Russia nung tamajungba akümer

Rongchii/April 14, 2020 (Agencies): alima nung coronavirus tasenb yagi nisung million 1.92 shi menepogo, nisung 119,500 shi süogo aser nisung 450,000 jungnüa taneptsü nguogo, ta Johns Hopkins University ajanga ashir.

Kasa mapang US kübok New York state kija nunga iba virus yagi nisung 10,000 dak tema süogo.

Japan nung aliba mozükitem nung coronavirus tashidak wara mechi hand sanitizer agimaba mapang alcohol aliba tajemtsütem amshitsü, ta ketdangsertemi ashi.

Alcohol shilem 70 aser 83 tsüingda aliba spirit tem ya teka shidokba nung amshitetsü, ta health ministry ajanga ozüung tasen yangluba nung shia lir.

Vodka karbo kanga tashi tait lir, saka Japan nungertemi mejemtzü mesükba mozü amshiba ajanga alcohol shilem 22 aser 45 tsüingda dang kümdaytsür.

Guinea Tir Alpha Conde-i coronavirus tashidak wara prokshiba nungi nokdangtsü mechi nisung ajak mask agitsü telemteba agiogo.

A i b e l e n e r t e m senzüsembongba nungi nokdangtsü aser tashi mangaba senchi sen Guinean francs 30,000 meshitsü, ta pai Hombar nikongdang television ajanga sangdong. Iba totuyuba ya Honibarnü nungi amshir.

Conde-i company, minister aser NGO ajak dang mapa inyaker ajak nem Honibarnü tashinung mask agütsütsü metetdaksü. Paise linük nung mask yanglua jenjang talangyong ayoktsü ajungshia liasü.

Ita ka nung tang mezüngbuba novel coronavirus agi asür tajemba akümer, ta Iran-i ashi.

Health ministry odongtar Kianoush Jahanpour-i ashiba agi, tesüiba ghonda 24 tsüingda COVID-19 agi linük nung nisung 98 asü, aser tang

tashinung asür ajak agi 4,683 jungogo.

Spain nung kasa mapang coronavirus tashidak agi nisung 567 süa tang tashinung iba virus agi asür ajak agi 18,056 jungogo, kob alima nung United States aser Italy sülen jenjang tasembuba nung lir. Iba linük nung nisung 172,541 dak COVID-19 tashidak jangjateta lir.

Russia nung novel coronavirus agi meneper nisung 20,000 alemogo aser nisung 200 jungnü süogo, ta ketdangsertemi ashi.

Tesüiba ghonda 24 tsüingda nisung 2,774 dak COVID-19 puteta tang linük nung iba virus agi menepa alir nisung 21,102 jungogo, ta Russia indang coronavirus task force sangdong ka ajanga ashi.

Kasa mapang nisung 22 asüba ajanga tang tashinung kasa virus yagi nisung 170 taküm agiogo aser nisung 1,694 taneptsü nguogo, ta parnokisa ashi.

China nung coronavirus mozü tendangtsü melar

Suifenhe, Rongchii/April 14 (Agencies): China-i coronavirus tasenba den raratsü mechi mozü tabu ana tendangtsü melaogo, kong iba virus mezüung putet aser bendanglen, talisa Russia nungi menar aruba ajemdaktsütsü merangba mapang ka lir.

China-i COVID-19 tashidak menar arur rongnung Russia ya tongti kümogo, kong linük north tsütsü kidanger linük nungi nisung 409 dak menaba puteta lir. Yangji aliba China nungertem kidangi meyipa marudaktsütsüla, ta sorkar meyong Global Times osangkaket nung Mongulbarnep yimo züluri zülua liasü.

"China nungeri Russia nung coronavirus agi kanga mejungi kongshiba nguogo... Iba ajanga arrsangtsüla: China nungeri item tesemtem nungi arurtem kanga sashia nokdangtsüla aser tanaben wara poktetba nungi jenbuttsü merangtsüla," ta Communist Party indang

People's Daily meyong osangkaket nung shia lir.

China northeast tsütsü arrtsülen aliba Heilongjiang province nung Hombarnü bendanglen nungi coronavirus menar aruba nisung 79 dak putet, ajak ya China nunger Russia nungi aruba, ta osang ajanga ashi. Mainland China nung nisung tasen 89 dak putetba osang lir.

Heilongjiang province ketdangsertemi Mongulbarnü ashiba agi, illegal immigrants tem aruba osang metetdaksür nem sen yuan 5,000 (\$710) tashi agütsütsü, ta metetdaksü.

China nung coronavirus agi tang tashinung nisung 82,249 menepa lir aser nisung 3,341 süogo. Mongulbarnü nisung asüba osang mali.

Mongolia nunga nisung tasen 13 dak iba virus jangjatet, aser parnok ajak ya Russia nungi menar aruba lir.

China nung coronavirus tashidak tanaben aruba

nokdangtsü merangba mapang nisung dak mozü ana tendangtsü, ta Xinhua state news agency ajanga ashi.

Iba mozü ya Beijing nung aliba Nasdaq-listed Sinovac Biotech (SVA.O) aser sorkar meyong, China National Pharmaceutical Group nung affiliate süa aliba Wuhan Institute of Biological Products ajang yanglu.

March ita nunga China mitkartemi yariba Academy of Military Medical Sciences aser Hong Kong nung aliba biotech firm CanSino Bio (6185.HK) ajanga yangluba mozü ka clinical trial atema mela.

U.S. National Institutes of Health den lungjemer U.S. nung mozü yanglur, Moderna (MRNA.O) temia nisung dak mozü tendang tenzüokogo, ta shia liasü.

Mozü bushitetsü teimla liaka iba wara ya küm ana tashi atsülanga aotsü, aser mask amshiba aser lokti tulu adenshiba maneni nokdangtsüla,

ta Chinese Academy of Engineering nung academic aser Tianjin University of Traditional Chinese Medicine nung tir, Zhang Boli-i ashi.

"Asenoki mapang talangka atema renemshia alitsüla," ta pai ashi.

Ato Kilonser Li Keqiang-i anir Hombarnü senden ka amenba mapang China indang coronavirus task force ajanga arrtsülen health resources tali amshitsü lemtet.

Parnoki arrtsü anasa mozüki yanglua isolation point tem amenoktsü aser kidanger linüktem den osang agitepba nung akhangshitsü, ta ashi.

Saka linük aika den gari lenmang, tetsüung lenmang, tzi lenmang aser tenemlen aliba lenmangtem aika aliba ajanga azüoktsü asaker, ta ketdangsertemi ashir.

Russia nungi tashidak menar alir kata China-i maitdaksütsü mechi Heilongjiang province kübok Suifenhe yimti nung

checkpoint inok, train service ajemdaktsü aser temelaba balka melie gari mesenzüdaksür.

Iba tesem nung customs ketdangser Piao Minghua-i osangbener dang ashiba agi, Suifenhe-i aiter ajak dak coronavirus tendanger, contact tejangja agütsür aser quarantine asür.

Iba yimti nung alirtem ya anogo asem nung khen kidang nungi ayazüktsü melar, kong dokan aika shibanga lir.

China-i northeast tsütsü arrtsü nung temulung tali agüjaka southwestern tsütsü Yunnan province nung arrtsü alema aiter nisung 100 dak tema March ita apu, ta Hombarnü menur sangdong ka ajanga ashi.

April ita Laos aser Myanmar nungi China nunger mapa inyaker aser shishilembar timba süür Yunnan province telungi nisung meyirijang aika aita Xishuangbanna ama arrtsülen aliba tesemtem nung khuret tali agütsür.



Tanu agi anogo pungu nu Mokokchung Municipal Council (MMC) Sanitation Worker-temi Mokokchung town nung tongtibang lenmang aser tesemtem nung mesen tepsetba mozü roka jajaba mapang tangokba noksa nung angur. Parnoki Mokokchung quarantine centre, shishilembaba tesem, office building, petrol pump, nübur bulua senzusenpongba tesem, town tiyong aser ward balala nung gari lenmangtem nung mozütemji roka jajaogo, ta osang angazüker. MMC sanitation worker-temi ani belem jenti arema nübur kumzuka ayutsü asoshi mapa tajung inyakba ngua senso aikati pelaba lemsatep. Mokokchung, April 14, 2020.

Longleng nung Makeshift Hospital lapoktsüogo

Longleng, Rongchii/April 14, 2020 (TYO): Bautung Higher Secondary School, Longleng nung April 14, 2020 nü tongti o jembir Longleng District, Deputy Commissioner, M. Shayung Phom matsügang Longleng Town Baptist Arogo, Sannüker, Beau Phom-i Makeshift District Hospital meshiteta sarasadema lapokja liasü, ta sangdong ka ajanga metetdaksü.

DC, Shayung-i jembiba mapang pai, nüburtem kumzuka yutsütsü asoshi District Hospital aser CMO Office Longleng nung bendanga agüja inyaker doctor, nurse aser medical staff tem nem tenüsang agüja liasü.

Mozüki nung nübu, medical mongintem aser medical sübosülemstütem peria maliyongjia, nüburtem tajungtiba nung tenzüksü/ anepalutsü asoshi tang aliba osettsüsettem amshia doctor, nurse aser staff temi meranga

inyakba indang pai metetdaksü. COVID-19 anema raratsü asoshi jakyim sür inyakertemi pei tata wadang nung ano tali bendanga agütsüshir inyaktsü aser nüburtem nüngdakba peridaksütsü asoshi Shayung-i mepishia liasü.

State aser district arrtsülen yimtsüng tem indang tensa asadanga aser azüoktsü asoshi police den külemi Medical Department aser sorkar ketdangsertem mazüangi senzüdar, ta paisa metetdaksü.

Longleng district nung iba wara anema raratsü asoshi sorkar agency tem aser lokti tentet balala, Police aser Medical department temi maneni teyari agütsüba asoshi Shayung-i pelaba metetdaksü aser tarutsü anogotem nunga iba ama yaritepba den amalitepa inyaka aotsü asoshi pai mepishi.

Sentong tentenzüklen, Longleng Town Baptist Arogo,

Sannüker Beau Phom-i Makeshift Hospital Longleng meshiteta sarasademtsü. Iba sentong tembanga District Hospital Longleng, Medical Superintendent, Dr. Lhouvizotuo Belho-i tepela anküp o jembir aser lenmang balala ajanga Medical department nem teyari agütsür ajak dang pai pelaba metetdaksü. Iba sentong nung Dr. Bongnau Phom mendenti liasü.

Bautung Government Higher Secondary School, Longleng nung Makeshift Hospital lapokba sentong tembanga sülen, iba mozüki nung maparen tenzüka liasü.

District hospital Longleng ya COVID-19 patient tem anepalutsü asoshi amshir asünung, tang nungi tenzüka medical service atema Makeshift Hospital semdangtsü asoshi Longleng nüburtem dang metetdaksür, ta kasa sangdong nung shia lir.

Tuensang ADC-i Ward lenirtem den shisadokden senden amen

Tuensang, Rongchii/April 14, 2020 (TYO): Tuensang, ADC, Ajit Kumar Verma aser SDO (C) Tuensang, Shelly Khatery nati April 14, 2020 nü ward lenir ajak den CKS Hall, Tuensang nung shisadokten senden ka ayongzuka agiogo, ta sangdong ajanga metetdaksü.

Senden nung Tuensang, SDO (C) Shelly-i, iba ama tensa ka nung temulung agüja inyaktsü asoshi ward lenir ajak ajungshi aser COVID-19 anema raratsü aser iba wara

nokdangtsü atema District Administration ajanga agütsüba tetuyuba ajak tashi anga anidaktsü aser amalitepa telongjem nung inyaka aotsü asoshi ayongzuka liasü.

Paisa, jang-o-tzü aser nüngdakba osettsüsettem alitsü asoshi yimdong nung akok tashi nisung tajemba adenshia lijaliyongdaksütsü asoshi lenirtem dang mepishi liasü.

Kasa senden nung, Tuensang ADC Ajit-ia, tashidak nokdangtsu aser Covid-19 wara prokshia meyoktsu asoshi linük

mokdanga ayutsü koda tongtibang iba indang lemsatepa liasü.

Paisa, nisung kar dak COVID-19 tejangja aliba tendangtetra, item ward shibangtsütsü asoshi senden nung adenertem den tasa balala lemsatep.

Iba ama tensa ka nung nüngdakba mapang teyari agütsütsü asoshi ASHA den volunteer ama training agitsü asoshi tenüngtem agütsütsü mepishiogo, ta kasa sangdong ajanga metetdaksü.



Dimapur, Rongchii/April 14, 2020: Covid-19 wara nokdangtsü asoshi jakyim sür inyakertem nem Village Guards (VGs), Lineman (Power Department) aser PHED tem longjemer maneni teyari agütsüba atema Shamator nung alir nüburtemi pelaba metetdaksüogo. Information Assistant indang office ajanga Shamator jila indang Village Guard (VGs) ajak nem mask peria lema agütsüba yangi noksa ajanga kuli sayur.

Office of the MOLUNGKIMONG MEJENSANGER PUTU Dist: Mokokchung, Nagaland P.P. Tuli. 798618 PELABA LEMSATEPER

Alima ajunga COVID-19 tashidak wara agi sünger yim ajaklen among süngkum shibanger nüburtem terokong tia nung aliba mapang nüburtem timtemba ajiteta Minister, Higher & Technical Education, Tribal Affairs, Nagaland, Temjen Imna Along aser Advisor, Treasuries & Accounts, National Highways Dr Longriniken nati ozü Molungkimong nung timtemer, talisa matamabensar aser teintet rogotem, nem jang-o-tzü angadi agütsüba asoshi ozü Molungkimong Mejensanger Putu menden ajanga lenir ana dang kanga pelaba lemsateper.

Nüburtem asoshi nena taküm Tsüngremi maneni moajang, ta sarasademtsür.

**Y. Imsü Tzudir
Chairman
Molungkimong Village Council**

SANGDONGER

Convid 19 pandemic tashidak dak sendakba nung tesüyiba mapang sangdong anaben agütsüogo, aser iba tashidak tajungba makum nung, nüboritem kumzüksü nükjidong nung maneni Rionsanger Putu Menden, Chuchuyimlang nung lemtetba yamai sangdonger:

1. Chuchuyimlang senso tajung kwika bendanglen prokshia lir, Rionsanger Putu Menden nung telemtetba ka maki tashi shinga Chuchuyimlang lushi telungi ait-tsü memelatsü.
2. Rionsanger Putu Menden nung telemtetba ka maki tashi bendanger shinga Chuchuyimlang lushi nung tetsüng ajemoktsü memelar.
3. Senso züngsem aser bendanger shiri aibelendir, Rionsanger Putu Tatar Salang (Chuchuyimlang) nung TEMERENSHI TULU agütsütsü.

**(AO SANEN PONGEN)
Awola**

**(TSUKJEMTANGIT)
Tezüluba**

Jenjang atettsü asoshi committee ka shimtet

Dimapur, Rongchii/April 14

(TYO): District Level Prime Monitoring Committee totuyuba kübok Dimapur nung nüngdakba osettsüset tem nung jenjang atettsü asoshi sub-committee ka tentet, ta Deputy Commissioner, Dimapur, Anoop Khinchi, IAS ajanga sangdong ka nung metetdaksü.

Sangdong ajanga ashiba agi, iba sub-committee report nung ajemdaker nüngdakba osettsüset kar nung wholesale jenjang tsünglanglen agüja aliba ama atettsür. Anungji tang nungi tenzüka ajaki iba totuyuba sülen anidaktsüla, aser aibelener nem ozüng nung aliba ama tapet temerenshi agütsütsü.

S/no.	Items	Existing Wholesale Per Kg/etc	Proposed New Wholesale Per Kg/etc
1.	Tomato (Kharpetia)	Rs.20/-	Rs.18/-
2.	Tomato (Local)	Rs.12/-	Rs.12/-
3.	Green chilly (Big)	Rs.40/-	Rs.35/-
4.	Green Chilly (Micro)	Rs.50 /-	Rs.45/-
5.	Beans (Big)	Rs.30/-	Rs.30/-
6.	Beans (Small)	Rs.25/-	Rs.25/-
7.	Cabbage	Rs.10/-	Rs.12/-
8.	Brinjal	Rs.20/-	Rs.20/-
9.	Bitter Gourd (Big)	Rs.50/-	Rs.50/-
10.	Bitter Gourd (Small)	Rs.40/-	Rs.40/-
11.	Cauliflower	Rs.20/-	Rs.20/-
12.	Garlic (Big)	Rs.130/-	Rs.150/-
13.	Garlic (Small)	Rs.120/-	Rs.130/-
14.	Cucumber	Rs.15/-	Rs.18 /-
15.	Onion	Rs.28/-	Rs.26/-
16.	Potato	Rs.20/-	Rs.23/-
17.	Masoor Dal (Dal)	Rs.65/-	Rs.77/-
18.	Masoor Dal (Medium)	Rs.69/-	Rs.80/-
19.	Masoor Dal (Small)	Rs.84/-	Rs.90/-
20.	Moong Dal	Rs.106/-	Rs.120/-
21.	Arhar Dal	Rs.88/-	Rs.95/-
22.	Sugar	Rs.39/-	Rs.39/-
23.	Rice (Andhra /Arham)	Rs.1700/-per 50 kg bag	Rs.1885/-per 50 kg bag
24.	Egg	Rs.140/-per plate	Rs.150/-per plate

Nagaland Governor-i COVID-19.... (tapak 1 nungi...

Senden nung Nagaland Governor-i Chief Secretary dena "COVID-19 WAR ROOM" ka tentettsü tebilemba ka benok.

Iba "War Room" nung health dak sendakba maparen ajak adentsü, tongtipang nüngdaktem osang agitsü, COVID-19 dak sendakba law & order maparen, tangalen anendaka aliba nisungtem indang osang metetpelatsü aser anogoshia state nung COVID-19 indang osang tongteptsü, ta Governor Ravi-iashi.

Nagaland nung BSL Laboratory ka amenoktsü atema Defence Minister Rajnath

Singh-i Mumbai nungi Dimapur tashi tayimtsü ajanga osettem bener yokba atema pelar, ta RN Ravi-isa ashi.

Assam aser Manipur-i Covid 19 tendangtsü atema bener meyoki BSL Laboratory nung tendangtetsü. April 15, 2020 nü osettemji Airforce tayimtsü ajanga Dimapur tonga bener arutsü, ta paisa shisem.

Külen, Narendra Modi-i May 3, 2020 tashi linük ajunga shibangtsü telemtetba shitak agiba atema pelar, ta Governor-isa metetdaksü.

Iba ajanga khuret aika adoktsü saka sorkari nüboritem yaritsü nangzuka lir aser akokba tashi yariteptsü, ta paisa ashi.

Pakistan nungger cricket asayar Zafar Sarfaraz süogo



Lahore, Rongchii/April 14

(Agencies): Taoba mapang Pakistan nungger 'first-class' cricket asayar Zafar Sarfaraz dak COVID-19 tashidak keta aliba tejangja tengdangtetba sülen pa süogo, ta sangdong ka ajanga metetdaksü.

Tesüiba anogo asem tashi Peshwar kübok arishi küm 53 tain Zafar ya nija mozüki ka indang intensive care unit-

ventilator nung anepalua liasü, ta ESPN Cricinfo sangdong ajanga metetdakja liasü.

Pakistan nung COVID-19 wara ajanga asür cricket asayar rongnung Zafar mezüing kümogo.

1988 küm Sarfaraz-i mezüing cricket asaya tenzük aser Peshwar atema pai first-class asaya 15 nung asayaogo

aser pai run 616 yangluogo.

1994 küm cricket asaya nungi animesüngzük dang, Zafar-i one day asaya trok nung run 96 yangluteter liasü. Iba dak alia, 2000s tom nung Senior aser Under-19 Peshwar team naprongla coach ama Zafar inyakogo.

Zafar ya Pakistan nungger international cricket asayar Akhtar Sarfraz teti liasü. Zafar teno Akhtar-a tesüiba ita ter tejak dang colon cancer tashidak agi shirangba sülen, June 10, 2019 nü Peshwar yimti nung asü.

Tang Pakistan nung iba wara agi tonger alir nisung 5500 jungnüa lir aser item rongnung nisung 744 shi Khyber Pakhtunkhwa province anüdoklen tip tsütsü aliba Peshwar yimti nungi lir.

I-League nung asaya tanungba ajak athitsü renema lir

Rongchii/April 14, 2020

(Agencies): Coronavirus tashidak prokshi meyoktsü asoshi linük ajunga May 3 nü tashi mokdanga ayutsü sangdongba sülen I-League nung asaya 28 anunga aliba ajak athitsü renema lir.

Asayamung nung round pezü asayatsü anunga lia Mohun Bagan puri asayamung kokadokogo anungji parnok I-League champions asütsü.

All India Football Federation ketdangser kati ashiba agi, Brehostibarnü video call senden ka amenba mapang I-League nung asaya tanungba athitsü asoshi telemtetba agitsü imlar.

"I-League asaya tanungba

athitsü imlar. Tang tashi nungbo kecha telemtetba agia mali aser yanü senden amenba sülen osang kabo agütsütsü imlaa atar," ta AIFF ketdangseri ashi.

Senden nung sensak asemtsüba onüktem rongnung asayamung nung tanabuba aser tasembuba jenjang shimtsüba aser second division-i relegate sütsütsüba team shimtsü benoka jembitsü.

Tanabuba jenjang asoshi East Bengal, Minerva Punjab (team anapronglai asaya 16 nung point 23 nguteta lir) aser Real Kashmir (asaya 15 nung point 22 nguteta lir) tokteptsü.

Asaya tanungbatem athitsü asoshi sentong yangluba

mapang ka nung AIFF senden nung sempet sen tanabuba aser tasembuba jenjang nung tembangba team tem tsüingda lemdangtsü asoshi jembishinütsüsa akümtsü.

Kasa mapang nung AIFF-i takümbo team ka danga second division-i relegate süa meyoktsü asoshi telemtetba agitsü akok.

COVID-19 tashidak prokshia meyoktsü asoshi Ato Kilonser Narendra Modi nü linük ajunga ano May 3 nü tashi mokdanga ayutsü asoshi sangdongogo. Iba tashidak yagi tang tashi nung India nung nisung 300 süogo aser alima ajunga nung nisung 1,00,000 dak tema süogo.

Italian FA-i asayartem tashidak tendanger training tenzüktsü imlar

Rome, Rongchii/April 14

(Agencies): Season tenzükshitsü asoshi May ita renemshi tenzükba mapang asayartem ajak dak coronavirus tashidak tendangtsü Italy football federation-i imlar, ta tir Gabriele Gravina-i ashi.

March 9 nü nungi tenzükba Serie A masayai arudar aser season kodang tenzüktsü aji tang tashi mejangja.

Season nung ano round 12 asayatsü anunga lir aser iba den tanga fixtures aika anunga lir.

Gravina-i Sky Sport Italia dan ashiba agi, mapang kobika agidir agiaka season tembanga asayatsü asoshi pa mulungteter lir.

"Tensa tajungba kümli asayamung tembanga asayatsü," ta pai ashi.

"Senden ka yakta amentsü aser inyakyim ka latettsü aser

iba sülen metetdaksütsü. May ita asayartem dak tashidak tendangba sülen training tenzüktsü imlar.

"Onok lemluwa tepeyong asayatsü. Mapang ka lateta mali saka asayamung tembanga asayatsü sentong lir," ta paisa ashi.

Brescia densema club aikati iba asayamung maneni asayatsü sentong yangluba anema nokdakogoo.



FC Barcelona nungi asayar Lionel Messi indang Instagram account nung pa Spain nung lockdown mapang par kidang jabaso ana den tangokba noksa yangi angur.

Portugal football team-i tenla agütsütsü

Lisbon, Rongchii/April 14

(Agencies): Football team tasen yaritsü asoshi Portugal team-i Euro 2020 qualification senpet sen tesadang ka tenla agütsütsü, ta Hombarnü team-i metetdaksü.

Coronavirus wara aziüoktsü asoshi linük tesem ajunga nung maparen ajak shibangogo aser iba ya ajanga saisapong sentong ajak thitsüa lir.

"Professional aser non-professional football tsüingda tesendaktep tajung aliba tanela sayutsü asoshi, team ka ama, onok indang Euro 2020 qualification senpet sen shilem ka agütsütsü asoshi telemtetba agiogo," ta sangdong ka ajanga Portugal team-i metetdaksü.

"Football asaya nung onoki ajangshibatem aser onok career nung renloka odaktsütsü asoshi mulungsoa yarir ajak onoki mamai lir, anungji tongtibangsa non-professional competition club (Portugal nung football club) tem nungi asayartem nem

teyari agütsütsü asoshi onoki iba rongsen ya FPF (Portuguese Football Federation) nung bendenloksütsü lemtetogo," ta kasa sangdong ajanga metetdaksü.

Team-i parnok indang qualification senpet sen nungi shilem ka tenla agütsütsü osang tejangja memetetdaksü. Parnoki agütsütsüba rongsen teyari ya regional association aser club temi euro million 4.7 (million dollar 5.13) shi lemzüktsü imlar.

COVID-19 ajanga European league aika ita ka dak tema shibanger lir aser ibaji ajanga club tem senotsü agi kanga timtemdar.

Osang ajanga angazükba agi, Portugal nung coronavirus alir niusng 17,000 kümogo aser iba wara ajanga nisung 535 taküm samatsüogo. European league ya osang tejangja ka magütsü tashi thinena atatsü asoshi March 12, 2020 nü sangdonga liasü.

Fellaini mozüki nungi adokogoo



Shanghai, Rongchii/April 14

(Agencies): Taoba mapang Manchester United nungi asayar Marouane Fellaini, Mongolbarnü China nung mozüki ka nungi adokogoo. Coronavirus tashidak agi shiranga hopta asem temang anepaluba sülen pa adokogoo, ta par club sangdong ka ajanga metetdaksü.

Arishi küm 32 tain Shandong Luneng midfielder ya Chinese Super League (CSL) nung asayartem rongnungi tashidak menar pa kija lir aser pa ano temang maneni asadangtsü asoshi anogo 14 quarantine asütsü.

Belgium nungger international asayar-i, pa China-i aruli March 22 nü iba tashidak aliba putet, saka pa junga lir ta shiogo.

Jinan mozüki nung amungba mapang Fellaini-i Instagram nung pa exercise agiba video ka lemsatepa liasü.

"Fellaini temang

asadangogoo aser pa temang tajungba kuma tanü mozüki nungi yokogoo," ta Shandong puri sangdong ka ajanga metetdaksü.

China kong taoba küm December ita iba tashidak poktet, parnok ashiba agi, par linük nungbo iba tashidak aziüoktetogoo saka bendanglen nungi tanaben bener arutsü shisabulur.

Fellaini dak iba tashidak putetba ajanga CSL tenzüktsü timla aliba dak kanga mejungi kongshioogo, koba February 22 nü mapang telatet ka makai atsülanga atatsü telemtetba agi.

Fellaini, shiba toba mapang Everton nungia asayaogo, pa taoba küm February ita Manchester United nungi Shandong nung arua aden. Pa taa euro million 7.2 liasü ta osang ajanga metetdaksü.

China nung mezüing küm pai kanga junga asayaogo. Pai asaya 34 nung goal 12 idaktsü aser assist 5 süja liasü.

BILEMDANGANG

"Rongsen aser jenjang ajak dang nungi temeim taoba"